



PAMFLET

1494











63.  
IVSTI LIPSII

93 92  
T 704

# EPISTOLA,

quâ

respondet cuidam viro Principi deliberanti BELLVM-  
ne an PAX an potius INDVCIÆ expediant  
Regi Hispaniarum cum Gallo,  
Angla, Batavo.

*Scripta IIII Ianuarij, M. D. XCV.*

*Nunc primum edita.*



ANNO MDCCVIII.

1494



IVSTI LIPSE

# EPISTOLA

ad

respondet quidam viro Principi delphico BELVAM.  
in vestris INDVIAE expeditione  
Regi in Hispaniam cum Gallo  
Angli, Braxo.

Scilicet in Iuvencio, M. D. XCV.  
Lipsum in illis.

Anno 1594



## Vir Nobilissime,

**V**T literas tuas manu mea posui, calamum in eam inserui ad respondendum. An non lubens & subito facerem, quod amicus volebat? vir è Principibus petebat? patriæ utilitatē tangeret? Ego verò lubens atque etiam calidè; etsi hæc aura à tenui præsertim meo corpore calorem omnem arcet. Sed animus erectus & alacer is est, qui hæc & alia vincit. De re igitur audi. Deliberatur, bellum an pax cum hoste placeat, & dicam distinctè sententiam meam. Hostis nobis triplex, ut nunc est status rerū; Gallus, Angla, Batavus. Duo illi externi; hic tertius internus, & rebellis potius quàm hostis. Si igitur de prioribus quæritur, à Regis hoc consiliis totum & opibus pendet, bellū an pacem cum iis velit; & utrum pro re conducatur. Si metus ab illo barbaro & cōmuni hoste Austriacis non esset, ego putarem Regem tractu omnes istos posse frangere, si tantū bellum ex fide & disciplina aliqua geratur. Fidem dico in pecuniarū administratione & munerum; ut illa non dissipetur, ut hæc idoneis & dignis dentur: Nā de fide in ipsum Regem, vix puro ambigendum aut quærendum. Addidi disciplinam, quoniam revera sine ea (fiant & dicantur omnia) bellū nullū feliciter satis & fortiter geretur. O militem bonum admodum, & minores duces! sed opus est isto legum & severitatis quodam vinculo, quod cōstringat, & vires & viros istos utiles Reipublicæ reddat; diffluunt alioquin per lasciviam, per libidinem, per ferociam: nec aliud



in ista militari turba, quàm rapinæ aut seditiones. Tu & prudentes nostis, me vera dicere; & fons malorū nostrorum est iste. Si hostis progressus fecerit, à regressu nostro est; atque is vitia nostra virtutem suam interpretatur, & superbè ac stolidè in iis se jactat. Sed ut diffundar, & collectè sententiam peragam; quoniam bellum grande ac metuendum Europæ instare à Christiani nominis hoste videtur, Rex & consilium ejus vidento; an non melius cum externis illis hostibus, aut certè alterutro eorum, pacisci. Si cum utroque, Batavi ponent animos, & aut sponte aut vi venient sub leges: si cum altero, etiam idem fiet. Volo dictum cum altera, id est, Angla. Illa in manu oppida duo Zelandiæ & Hollandiæ habet, aditus haud dubiè & claustra maris & terre. Non nimis à pace abhorrere eam, ego arbitror; quia mulier est; quia ærarium jam tenuè; (non eæ opes quæ putantur) quia populo invito bellum est, qui commercia & libertatem mallet. Quod perseverat, magis a metu, quàm ab odio est. Et audi verum verbum: magnitudo nostri Regis, virtus aut fortuna Hispaniarum intra sexaginta annos formidabilis facta est finitimis & longinquis. Metū hunc adimere, ambitionem non præferre, è re sit in primis: & facta sanè, non verba, impetū augent. De Gallo pariter sentio, id est, eum occultè & tacitè omnino velle pacem. Novellum ejus regnum, status vacillans, dissidiū aut suspicio inter viros Principes; ea omnia quietem suadent. Et addo viscera ipsa, ut sic dicam, ærarij evulsa. Nisi exteri palā & occultè sustentent, ac focillent, jam defecisset. Sed cum isto an Rex noster

pacem



pacem velit, haud equidem scio; penetrare in consilia illa intima nolo: potest tamen inducias salva omni spe sua & destinatione. Quid enim ibi in longum firmi? ne successor quidem satis certus quorundam judicijs, & in corpore illo semel moto, vereor, ut alij alijque morbi, nisi magna quidem Regis aut felicitas aut prudentia evincat. Sed definiendo; cum Angla pax opportunissimè fiat: Gallus seponatur, qui, nisi lacepsitus, non laceisset. Batavi in manus veniant, de quibus propriè puto te rogare. Quid ergo? cum iis bellum hætenus infelix, nec nunc felicius sperandum, nisi in tota facie rei aliquid mutetur. Loca valida omnia habent, loca sibi opportuna, militem exercitatum & satis bonum, victorijs animosum, ordinem aliquem in ærario & tota gubernatione, quam diu bellum & metus est, haud facile solvendum: ut ista remittantur, & amittantur, pax aliqua sit & quies, quæ nunquam in talibus bellis inita sine bono aperto Regis. Majestas illa nominis & occultum in animis vinculum illos trahit aut potius retrahit, qui malè abierunt: & quidam gaudent datum honestum sic regressum. Centeni aliquot homines aut milleni ad religionem & regem ultrò redibunt, si occasio redeundi suggeratur: hæc præsidia hostibus detrahimus; & amplius, in plebeia aut plurimum illa gubernatione, occasiones inter ipsos dissidiis damus. Mihi crede, habent odia, factiones, & sua vulnera; sed occuluntur ea omnia impendente magno illo metu, qui æqualiter tangit omnes. Remitte paululum, ad ingenia & vitia sua redibunt; ut boves instante lupo coeunt, capita & cornua jungunt; abeunte, quisq. sibi pascit.



scit. Sic Batavi nostri, quos ambitio fortasse valdè nō t̄agit, magis avaritia & amor quæstus. Vbi hoc postremum: an non regibus semper occasio ad se trahendi? an eo isto hamo piscandi? Intelligūt peritiores. Sed ut fiat utiliter, quiete aliqua opus est, & occasiones ea dabit. In ista, inquam, ferè omnes consentimus. sed alij diuturnam eam volunt, id est, pacem: alij tēporaneam, id est, inducias. Tu utram? audi. Pacem ex animo velim, & ponam ante omnia humana bona: religioni & regi pulcherrima sit, patriæ necessaria, bonis & mediocriter bonis optatissima. Sed quid est? velim & optem, vereor, quod non fiet. Ego bonam honestamque pacem hac scena rerum fieri posse, in animum non induco. Causæ: Aut inclinatio hostium, aut à nobis metus eò ducat. Neutrum est. Et vide, an inclinatio: minimè. Sunt in florenti sua re publicè & privatim; qui gubernant, Craissi omnes sunt & parvi Croesi. Vis eos optimam fortunam cum dubia cōmutare? At metuunt fortasse. Vtinam nostra sic essent. Debebant profecto, à potentissimo Rege, à legitimo suo Rege, ut id quoque addam; sicut olim à dominis suis fugitivi. Sed reverentia, vetustate & pertinacia rebellionis, iam excussa, & metu, ignavia (liceat liberè hoc dicere) aut pravitate nostra [quis ordo? quis miles? quæ consilia?] cur metuant? nisi occulta quedam sint, & tegantur, quæ me fugiunt. Omnia sunt talia, quæ ad perseverandum eos hortentur, non resipiscendum. Addo fœdera cum vicinis, cum quibusdam etiam Germanis clam aut palam icta: navigationes novas speratas, imò tentatas: quæ etsi infida omnia & vana quidem sunt, tamen plebeios



beios illos animos inflant, & auram inspirare modestiæ  
 non patiuntur & bonæ mentis. Ergo de pace vix est ut spe-  
 rem, nisi tali, quæ disiungat a Rege, quæ licentiores & illos  
 & nos faciat; quò scio quosdam spectare. De religione  
 consultò omitto; & Theologis permitto; etsi ratione ejus  
 inter prima habendam, sapientes omnes sciunt. Magis  
 itaque ad inducias inclinè: Primùm, quia hostis facilius au-  
 diet, nec multa hic obstacula in cōditionibus ac pactis; res  
 manent utrimque imminutæ. Deinde, quia autoritate  
 Principum Germaniæ tale aliquid honestissimè impetre-  
 tur, & sine ignominia Regis. Tertiò, quia leges nullæ duræ  
 nobis imponuntur, quas ægrè aut turpiter postea solvamus.  
 Quartò, quia commoda similia, quæ ex pace sequuntur;  
 nempe communicatio inter nos & conjunctio, partium  
 reditio sub diplomate regio & fide, remissio hostium, &  
 omnia minus intenta. Denique fatum, & Deus, & eventus  
 aliquis pro Rege. Vis exemplum illustre in hanc rem &  
 consimile? Sexti Pompeij bella Sicula cum Octaviano  
 Casare legisti? Siciliam & Sardiniam habebat, locis se te-  
 nebat, & tuebatur, famemque & inopiam Italiæ importa-  
 bat. Vinci numquam potuit, nisi brevi pace. Ea pacta cum  
 illo est, cives recepti, & vires abductæ, corruptus occultè  
 ejus miles. Quid dicā? Terribilis ille & paulò ante Neptu-  
 nus, vix una navi effugit, cervices gladio præbuit, & intra  
 annum extinctū totum bellū. Vetus hoc est; fiet novum,  
 si eadem adhibentur, & imprimis si consilio & intentione  
 rem administramus. Acribus cōsiliis opus est, iisque fidis,  
 occultis. Quod si non aliud etiam ex his induciis, quam  
 respiratio



IVSTI LIPSII EPISTOLA.

respiratio aliqua & quies; pro re nostra multum sit; & egemus. Rempublicam aut disciplinam militarem emendare si volumus (debemus, si regere Regem volumus) non fiet aptè aut citò per arma. Licentia nimis invaluit, corruptio, & mala, quæ optimis potentissimisque rebus & regibus sunt perdendis. Huc ut nostri eant, ex animo voveo; quæ fulcra & fundamenta sunt omnis status. Habes uno calore & tenore scripta, quæ mihi sunt visa; quæ preme aut communicabis, quædam aut omnia, ut tibi erit visum. Epistola enim tua est: utere, sed non abutere; & si pro amicitia hoc quoque potes. Non enim nisi verba sunt: si aliqua incauta, excuset amor in patriam, & libertas, quæ consulenti semper data est. Lovanij, 11 Nonas Ianuarij, CIO, 10, XCV.





